

12/06/1997

Kediaman, Kompleks JPM jadi tempat bersejarah

KUALA LUMPUR, Rabu - Kabinet bersetuju Kediaman Perdana Menteri, Datuk Sri Dr Mahathir Mohamad di Seri Perdana dan Kompleks Jabatan Perdana Menteri (JPM) di Jalan Dato Onn di sini dipertahankan sebagai tempat bersejarah selepas pusat pentadbiran kerajaan berpindah ke Putrajaya di Sepang.

Menteri Kebudayaan, Kesenian dan Pelancongan, Datuk Sabbaruddin Chik, berkata bagi tujuan itu Kabinet secara prinsip meluluskan peruntukan kira-kira RM30 juta untuk menjadikan Seri Perdana sebagai Galeria Perdana Dr Mahathir dan Kompleks JPM sebagai Pustaka Institusi Perdana Menteri.

Menurutnya, ini bermakna kedua-dua tempat itu yang bakal diletakkan di bawah tanggungjawab Arkib Negara sebagai tempat bersejarah bagi mengiktiraf dan mengenang jasa Perdana Menteri, untuk mengelak ia diambil untuk dijadikan projek komersil.

"Seri Perdana akan menjadi Galeria Perdana yang akan mempamerkan hadiah dan cenderamata yang diterima Dr Mahathir daripada pemimpin dan tokoh dunia serta masyarakat Malaysia sebagai penghargaan terhadap jasanya kepada negara.

"Kami juga merancang menambah dan mengumpul hadiah milik Dr Mahathir, memasang cermin di bilik tidur dan bilik mandi beliau supaya orang ramai boleh melihatnya dari luar," katanya kepada wartawan selepas mesyuarat Kabinet, di sini hari ini.

Menurutnya, rancangan penubuhan Galeria itu perlu dibuat sekarang kerana Perdana Menteri boleh menunjukkan dengan tepat tempat di dalam kediamannya ketika beliau menjalani urusan kehidupan harian di Seri Perdana.

Beliau berkata, Kompleks JPM pula akan dijadikan Pustaka Institusi Perdana Menteri yang bakal menempatkan Monumen Ketua Eksekutif Negara, pusat sumber dan pusat perkhidmatan perpustakaan awam.

"Berdasarkan kepentingan JPM yang menjadi komponen terpenting Jabatan Perkhidmatan Awam, Kementerian memikirkan wajar dan sesuai supaya Kompleks JPM dan Seri Perdana itu diserahkan kepada Arkib Negara," katanya.

Bagaimanapun, menurutnya, rancangan itu adalah untuk jangka panjang dan ia dijangka bermula apabila JPM berpindah ke pusat pentadbiran baru di Putrajaya, Sepang.

"Kita juga mungkin menyambung projek Galeria Perdana yang bermula di Langkawi itu selain merancang mewujudkan satu di Kuala Lumpur dan kemudian di Labuan," katanya.

Sabbaruddin berkata, bagi mengawal selia dan urusan pentadbiran Galeria Perdana, Kementerian akan memohon mendapatkan kakitangan mengendalikannya.

(END)